



Pauc da far per ils tiradurs tar il campinadi grischun a Domat. (da san.) Anna Laura Klucker, Enrica Caluori, Annina Tomaschett e Lars Färber.

# Bunamain in naufragi per ils tiradurs

Tir: Campinadi grischun arma 50 meters

DA GION NUTEGN STGIER / ANR

■ **Lars Färber ed Anna Laura Klucker tar l'elita, Marie-Louise Degonda tar ils veterans sco er Annina Tomaschett ed Enrica Caluori tar ils juniors han decidì a lur favur l'occurrèntia chantunala. Plain tensiun è stà il tir trais posiziuns tar l'elita cun decider il segund davos culp tgi che gudogna la disciplina.** Il Campinadi grischun cun l'arma da calber pitschen sin la distanza da 50 meters ha gù lieu a Domat. Cun esser pulit vent èn las relaziuns stadadas pretenziusas. Tuttina han las tiraduras ed ils tiradurs persvas è confermà d'esser prontos per ils Campinadis svizzers a l'entschatta da settember a Berna.

### Ferma concorrenza per Lars Färber

La disciplina roiala è quella da trais posiziuns (en schanuglias, en venter ed en pe). Per la qualificaziun èn mintgamai vegnids sajettads 20 culps ed en il final lura 45 culps. Fin vers la fin dal final era *Carina Caluori* (Razén) sin la meglra via da gudagnar l'occurrèntia. Ella e *Lars Färber* (Favugn), il victur da festa da la Festa chantunala da tir 2018 en Sursleva, han tratg fitg equilibrà bunamain fin tar il davos sajet. Decidì a favur dal tiradur ha il segund davos culp nua ch'el ha scrit in 10,3, dentant che la matta ha be sajettà in 8,5. Färber è daventà campin grischun cun in resultat da 441,5 puncts ed er grazia a las bunas passas en venter (154,5 puncts). Caluori è vegnida vice-campionessa grischuna cun 440,8 puncts. La victura 2017, *Elena Toma-*

*schett* (Rabius), ha cumpletà il podest grazia a ses 426,6 puncts. Manchentà da far la medaglia da bronz ha per pauc *Andri Tomaschett* (Trun) cun vegnir quart.

### Per l'empirna giada campionessa grischuna

Er en la disciplina en venter tar l'elita era Färber il grond favorit. Fatg fin a sias ambiziuns da gudagnar er quella concorrenza ha lura *Anna Laura Klucker* (Tumein). Ella ha sajettà precis, fitg constant e daventada cun raschun per l'emprima giada campionessa grischuna tar l'elita cun in total da 247,0 puncts. En ils 24 sajets finals ha la tiradura da sport be sajettà trais giadas sut in 10,0. Färber è vegnì sin plaz dus cun 245,4 puncts e terz è daventà *Roland Schmed* (Domat) cun in resultat da 223,4 puncts. *Curdin Candrian* (Surin) ha terminà il tir sco quart. *Marie-Louise Degonda* (Cumpadials) è vegnida campionessa grischuna tar ils veterans grazia a ses 244,8 puncts avant *Guido Casutt* (Flem) cun in resultat da 236,9 puncts e *Reto Collenberg* (Surin) è vegnì terz cun sajettar 215,4 puncts.

### Clera victoria per Annina Tomaschett

Ina classa pers sasezza è lura stada *Annina Tomaschett* (Trun) tar ils juniors en la disciplina trais posiziuns. Da dir è dentant che *Valentina Caluori* (Razén), la gronda favorita, ha renunzià a quella concorrenza. La matta da Trun e commembra dal cader naziunal da juniors ha bunamain declassà concurrentas e concurrents sonda passada a Domat. Anni-

na Tomaschett è daventada campionessa grischuna cun in resultat da 427,2 puncts. *Natasha Bischof* (Mastrils), ella è vegnida segunda cun in total da 422,4 puncts. Ina surpraisa è lura il terz post da *Leandro Petschen* (Trun), el ch'ha terminà il tir cun 410,5 puncts. *Chris Wolf* (Trun) è vegnì 5avel en quella categoria.

### Victoria per Enrica Caluori

A *Valentina Caluori*, la matta ch'è sa qualificada per ils Campinadis mundials da juniors en la Corea dal sid, n'èsi betg reussì da defender ses titel tar ils juniors en la disciplina en venter. Ella era in pau malsauna e na cumplettaimain tar forzas tar la concorrenza chantunala a Domat. Gudagnà il tir ha lura *Enrica Caluori* (Razén), sia cusrina, e quai cun in resultat da 243,2 puncts. *Valentina Caluori*, ella è vegnida sin 242,6 puncts e segundada avant *Luca Kaufmann* (Zezras) ch'ha sajettà 222,3 puncts. *Sandro Weber* (Domat) è vegnì quart cun in total da 201,2 puncts.

### Bilantscha positiva

*Hubert Tomaschett*, il schef matsch e sport da prestaziun tar la Federaziun grischuna dal sport da tir, ha fatg ina bilantscha positiva dal Campinadi grischun 2018 a Domat. El ha cunzunt ludà la buna disciplina da participantas e participants e lura er ils buns resultats da tuts e tutas ch'han cuntanschì in plaz da podest. Sonda proxima ha lieu a Cuir il Campinadi grischun sin la distanza da 300 meters e sin las distanzas 25/50 meters.



Èn stads sin il podest tar ils juniors trais posiziuns: Natasha Bischof, Annina Tomaschett e Leandro Petschen (da san.).



Buna disciplina tar ils Campinadis grischuns arma 50 meters a Domat.



Ferma prestaziun d'Anna Laura Klucker cun daventar campionessa grischuna.



Gion Paul Caminada (a san.) en discussiun cun Curdin Candrian.



Mancà in plaz da podest: Andri Tomaschett.



Arno Sgier intginas minutas suenter il tir da qualificaziun.



Il podest tar l'elita trais posiziuns: Carina Caluori, Lars Färber ed Elena Tomaschett (da san.).



Baseli Tomaschett (a san.) e Walter Umbricht, duas personas che vivan per il sport da tir.

FOTOS G. N. STGIER